

Headlines

1. साबका प्रधानमंत्री मनमोहन सिंह हुंदा दिल्ली च पूरा राजकीय सम्मान कन्नै खीरी संस्कार कीता गेआ।
2. मुखमंत्री उमर अब्दुल्ला होरें इक बैठक दौरान बर्फ हटाने, बिजली ते पानी दी सप्लाई गी बहाल करने आहले कम्मै दा जायजा लैता।
3. उपमुखमंत्री सुरेंद्र चौधरी होरें बक्ख-बक्ख मैहकमें दे कम्मकाज दा जायजा लैता। विकास दी रफ्तार तेज करने ते लोकें तगर पुज्ज बनाने पर जोर पाया।
4. इसरो आसेआ सोमवार स्पेडेक्स मिशन गी जारी कीता जाग, आखेआ केंद्री राज्यमंत्री डॉ. जतिंद्र सिंह होरें।
- 5 भारी बर्फबारी करी जम्मू श्रीनगर राश्ट्रीय जरनैली शिड़क, मुगल शिड़क ते सिंथन टाप गड्डिएं दी आओजाई लेई बंद, बर्फ गी हटाने दा कम्म जारी।

<><><><><><>

Manmohan Last Rites

साबका प्रधानमंत्री डॉ. मनमोहन सिंह हुंदा अज्ज नमीं दिल्ली दे निगम बौध घाट पर पूरे राजकीय सम्मान कन्नै खीरी संस्कार कीता गेआ। राश्ट्रपति द्रौपदी मुर्मू, उपराश्ट्रपति जगदीप धनखड़, प्रधानमंत्री नरेंद्र मोदी ते होरनें केइ मन्न-परमन्ने दे नेताएं जिंदे च केंद्री मंत्री राजनाथ सिंह, अमित शाह, कांग्रेस नेता मल्लिकार्जुन खड़गे, सोनिया गांधी ते राहुल गांधी होरें उनेंगी श्रद्धांजलि भेंट कीती। एहदे अलावा सेना, वायु सेना ते नौसेना दे प्रमुखें बी उनेंगी श्रद्धांजलि भेंट कीती। केई सारी विदेशी हस्तिएं जियां भूटान नरेश जिगमे खेसर नामग्याल वांगचुक ते मारीशस दे विदेश मंत्री होरें बी डॉ. मनमोहन सिंह होरें गी श्रद्धांजलि भेंट कीती। डॉ. मनमोहन सिंह हुंदा कल काल होई गेआ हा। ओहू 92 बरें दे हे।

<><><><><><>

CM-Administrative Meeting

मुख्यमंत्री उमर अब्दुल्ला होरें डिविजनल ते जिला प्रशासन दी इक महत्वपूर्ण बैठक लाई। इस दौरान उनें बर्फ हटाने, बिजली ते पानी दी सप्लाई दा जायजा लैता। एह बैठक वर्चुअल माध्यम राहें लग्गी। बैठक दौरान उनें खितें दी पूरी पराती स्थिति दा जायजा लैता। हाल च होई दी बर्फबारी दे मद्देनजर उनें जरूरी सेवाएं दी विजन त्रोजे दे दस्तयाबी लेई हिदायतां जारी कीतियां। बैठक च खासतौर पर ध्यान उनें सेवाएं गी बहाल करने पर दित्ता गेआ जिंदे पर मौसम करी माझा असर पेआ ऐ।

<><><><><><>

Dy.CM

उपमुख्यमंत्री सुरिंद्र चौधरी होरें अज्ज बक्ख-बक्ख मैहकमें दा निरीक्षण कीता। उपमुख्यमंत्री होरें उद्योग ते बार, सीकॉप, जेके मिनरल्स ते हस्तकला मैहकमे दा निरीक्षण कीता। चौधरी होरें मकेनिकल इंजीनियरिंग डिपार्टमेंट बिक्रम चौक जम्मू दा बी जायजा लैता। इस मौके पर अधिकारिएं कन्नै उनें गल्ल कीती। उनें हिदायत दिंदे होई आखेआ जे विकास आहले बक्ख-बक्ख जत्तें गी तेज गति कन्नै पूरा कीता जा। चौधरी होरें बक्ख-बक्ख कल्याणकारी योजनाएं दे फायदें गी लोकें तगर पजाने आहले तंत्र च बी तेजी आहने आस्तै आखेआ।

<><><><><><>

Health-Minister GMC

सेहत ते शिक्षा मंत्री सकीना इत्तू होरें सरकारी मेडिकल कॉलेज बख्शीनगर जम्मू दा चानचक्क दौरा लाया। दौरे दौरान मंत्री होरें अस्पताल च सुविधाएं दा जायजा लैता ते अमले ते मरीजें कन्नै गल्लबात कीती। उनें सेवाएं दी बेहतर ढंगै सिर पुज्ज ते आम लोकें दे मसलें दा फौरी हल करने दी सरकार दी बचनबद्धता गी जाहिर कीता। मंत्री हुंदा एह दौरा लोकें तगर सेवाएं दी पुज्ज, जवाबदेई ते पारदर्शिता गी बढ़ावा देने आहली भेठा सरकार दी बचनबद्धता गी दर्शादा ऐ।

<><><><><><>

Rana-Review Meeting

जल शक्ति मंत्री जावेद अहमद राणा होरें विधायकें ते डीडीसी चेयरपर्सन हुंदी मौजूदगी च इक मीटिंग दौरान राजौरी च होआ'रदे विकास कम्में बारै जायजा लैता। मीटिंग दौरान मंत्री होरें विकास दी गति बदाने आस्तै सांझे जत्न करने पर जोर पाया। राणा होरें जिला प्रशासन गी सेहत ते शिक्षा दे बुनियादी ढांचे च सुधार लेआने आस्तै आखेआ। मंत्री होरें जनजातीय कल्याण आहली स्कीमें ते पर्यावरण दे बचाव पर बी जोर पाया। राणा होरें आखेआ जे विकास लेई पारदर्शिता, जवाबदेही ते सामुदायिक भागीदारी मती जरूरी ऐ।

<><><><><><>

PM-Mann Ki Baat

प्रधानमंत्री नरेन्द्र मोदी अपनेमाहवार रेडियो कार्यक्रम “मन की बात” दे राएं कल देश-विदेश च रौहने आहले श्रोताएं कन्नै बचार सांझे करडन। हर म्हीने देअखीरले ऐतवारें दिनै 11 बजे प्रसारत होने आले इस कार्यक्रम दी एहू 117मीं किशतहोगा। मन की बात दा प्रसारण आकाशवाणी ते दूरदर्शन दे समूलचे नेटवर्क पर कीताजाहग। एहदे इलावा एहू प्रसारण आकाशवाणी खबरें दी वैबसाइट ते न्यूज़ ऑनए.आई.आर मोबाइल ऐप पर बी उपलब्ध होग। एहदे कन्नो कन्नी आकाशवाणी समाचार,डी.डी न्यूज़, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें परबी एहदी लाइव स्ट्रीमिंग उपलब्ध होग। आकाशवाणी परा मन की बात दे प्रसारण दे तुरतमगरा मकामी भाशाएं च एहदा अनुवाद बी प्रसारण कीता जाहग।

<><><><><><>

ISRO

भारतीय अंतरिक्ष अनुसंधान संगठन-इसरो नै सोमवार गी प्रक्षेपित कीते जाने आहले अपने स्पेस डोकिंग एक्सपेरिमेंट-स्पेडेक्स मिशन आस्तै सारियां तयारियां पूरियां करी लैतियां न। अंतरिक्ष राज्य मंत्री डॉ. जितेन्द्र सिंह होरें इक इन्टरव्यू दौरान आखेआ जे बरे दे अखीरें च छोडे जाने आहला इसरो दा एहू मिशन ऐतिहासिक ऐ, कि जे इसदे च अंतरिक्ष च दो उपग्रहें गी जोडेआ जाग। डॉ. सिंह होरें आखेआ जे स्पेडेक्स मिशन कन्नै भारत अंतरिक्ष च उपग्रह दी डोकिंग करने आले चुनिंदा देशें च शामिल होई जाग। उने आखेआ जे पीएसएलवी रॉकेट सोयां दो उपग्रहें गी को छोडेआ जाग।

<><><><><><>

Highway

जम्मू-श्रीनगर राष्ट्रीय जर्नैली शिड़क गड़िउएं दी आओजाई लेई बंद ऐ। एहू शिड़क केई सारी थाहरें पर होई दी बर्फबारी करी बंद ऐ। ट्रैफिक मैहकमे नै जानकारी दित्ती ऐ जे शिड़क गी साफ करने दा कम्म जारी ऐ। अमले ते मशीनें गी कम्मै पर लाया गेदा ऐ। लोकें गी सलाह दित्ती गेई ऐ जे ओहू मौसम साफ होने तगर इस रस्ते पर यात्रा करने थ्वां बचन। तोआई, ऐतिहासिक मुगल शिड़क जेडी शेपिया जिले गी राजौरी ते पुंछ कन्नै जोड़दी ऐ, ओहू बी गड़िउएं दी आवाजाई लेई बंद ऐ। अनंतनाग ते किश्तवाड़ बश्कार सिंथन पास बी बंद ऐ। प्रशासन आसेआ सारे बंद रस्ते गी खोलने लेई कम्म जारी ऐ। लोकें गी सलाह दित्ती गेई ऐ जे ओहू शिड़क सरबन्धी प्रशासन थ्वां शिड़क दी स्थिति दा पता लाने मगरा गै यात्रा करना।

<><><><><><>

Snowfall-Winter Festival

जम्मू खित्ते दी मती सारी थाहरें डोडा, उधमपुर, किश्तवाड़ च इस मौसम दी पैहली बर्फबारी होई ऐ। एहूदे कन्नै मकामी लोक ते इत्थे आए दे सैलानी खुश न। बर्फबारी करी उच्चिएं धारें पर पहाड़ चिट्टे होई गए न। एहूदे अलावा पतनीटॉप, नत्थाटॉप, सनासर, देसा, मरमत, पदरी ते चौगाम मैदान च बी बर्फबारी होई ऐ।

सालाना भद्रवाह विंटर फेस्टिवल कल्लै थ्वां शुरू होआ रदा ऐ। अधिकारिएं दा मनना ऐ जे ताजा बर्फबारी करी इस उत्सव दा आकर्षण होर बदी जाग ते खरी मती गिनतरी च लोक इत्थे औड़न।

<><><><><><>

Reasi-Trial Runs

भारतीय रेल नै उधमपुर-श्रीनगर-बारामूला रेल लिंक प्रोजेक्ट तैहत कटड़ा ते रियासी बश्कार आजमाइश दे तौरा पर रेल गड़ी चलाई। एहू उपलब्धि देश दे बाकी हिस्सें गी इस खित्ते कन्नै रेल नेटवर्क राहें जोड़ने लेई मील दा पत्थर साबित होग। कटड़ा ते रियासी बश्कार 18 किलोमीटर लम्मा एहू महत्वपूर्ण हिस्सा अत्याधुनिक बुनियादी ढांचे कन्नै लैस ऐ जिंदे च उन्नत सिग्नलिंग प्रणालियां, सुरंगा ते पुल शामिल न जेड़े चुनौतीपूर्ण थाहरें ते कुसै बी मौसमी स्थिति गी बखूबी झेली सकदे न। ट्रायल रन दे दौरान रेल ट्रैक दी स्थिरता, सुरंगें च हवा दा संचालन ते ट्रेन गी नियंत्रित करने आहले सिस्टम पूरी चाल्ली परीक्षण कीता जाग।

DC-Samba Social Welfare

डिप्टी कमिशनर साम्बा राजेश शर्मा होरें अज्ज कम्पोजिट रिजनल सेंटर दे स्थापना दिवस दे मौके पर आयोजित कीते गेदे इक्क कार्यक्रम च शिरकत कीती। इस कार्यक्रम दा सरिस्ता समाज कल्याण विभाग, कम्पोजिट रिजनल सेंटर जम्मू ते डिस्ट्रिक्ट क्रॉस सोसायटी साम्बा पासेआ सांझे तौरा पर कीता गेदा हा। कार्यक्रम दौरान दिव्यांगें ते पिछड़े तबकें आहले लोकें गी सहायक उपकरण ते होर दुइयां चीजां दित्तियां गेइयां।

<><><><><><>

Pak-Afghanistan-Clashes

पाकिस्तान ते अफगानिस्तान बश्कार होई दी बार्डर पर इक झड़प्फ च पाकिस्तान दे 19 ते अफगानिस्तान दे 3 आम नागरिकें दी मौत होई गई ऐ। दौनें मुल्खें बश्कार एह झड़प्फां पूर्वी अफगानिस्तान दे खोस्त ते पकटिका सूबे जड़े पाकिस्तान दे बन्ने कन्नै लगदे न, उत्थे होआरदी ऐ। अफगानिस्तान दे बन्ने पर तैनात सुरक्षाबलें पाकिस्तान दी मती सारी फौजी पोस्टें गी अली शिर जिले दे खोस्त सूबे च अग्गी दे हवाले करी दित्ता ऐ। एह झड़प्फां उस बेल्ले शुरू होइयां जिसलै पाकिस्तानी फौज नै पकटिका सूबे च मंगलवार गी हवाई हमले करियै 51 अफगान नागरिकें गी मारी दित्ता हा।

<><><><><><>